

解 飲 積

春 水 書

集 巖

詩 詩

鈔 集 集



飲
水
詩
集

納蘭性德 著

中
華
書
局

叢書集成初編

解春集詩鈔（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

飲水詩集

此據粵雅堂叢書
本排印初編各叢
書僅有此本

序

國朝詩別裁集載容若遼陽人康熙癸丑進士丙辰殿試官侍衛著有通志堂集其詩登五首而全集罕見是集飲水詩詞錫山顧貞觀閎定古燕張純修序而行之蓋兩公與容若交最深故思所以不朽容若者考別裁所登擬盧子諒時興山海關柳枝詞俱是集所未錄則知是集亦選存之本余在桂林側聞大中丞稚圭先生緒論及詞學推容若爲南唐後主眞派令曲勝於漫序出是集云得之京師廠肆惜其後闕頁余亟請刊布以廣其傳先生領之竊思容若爲大學士明公之子天姿慧悟清澈靈府年少通籍不永其年所作善言情又好言愁其纏綿悱惻之概時動簡外謂非得風人之旨而爲騷雅之遺哉

道光乙巳夏五月旣望華亭張祥河

飲水詩詞集序

余既哀容若詩詞付之梓人。刻既成。謹泚筆而爲之序。曰。嗟乎。謂造物者而有意於容若也。不應奪之如此其速。謂造物者而無意於容若也。不應畀之如此其厚。豈一人之身。故有可解不可解者耶。容若與余爲異姓昆弟。其生平有死生之友曰顧梁汾。梁汾嘗言人生百年。一彈指頃。富貴草頭露耳。容若當思所以不朽。吾亦甚思所以不朽。容若者。夫立德非旦暮間事。立功又未可預必。無已。試立言乎。而言之僅僅以詩詞見者。非容若意也。并非梁汾意也。語云。非窮愁不能著書。古之人欲成一家之言。網羅編葺。動需歲月。今容若之才。得於天者。非不最優。而有章服以束其體。有職守以勞其生。復不少假之年。俾得殫其力。以從事於儒生之所爲。噫嘻。豈真以畀之者奪之。而其所不可解者。卽其所可解者耶。梁汾從京師南來。每與余酒闌燈炮。追數往事。輒相顧太息。或泣下不可止。憶容若素矜慎。不輕爲文章。極留意經學。而所爲經解諸序。從未出以相示。此卷得之梁汾手授。其詩之超逸。詞之雋婉。世共知之。而其所以爲詩詞者。依然容若自言。如魚飲水。冷暖自知而已。區區痛惜之私。欲不言不忍。姑述其大略如是云。時康熙辛未秋仲。古燕張純修書於廣陵署之詒石軒。

右飲水詩集二卷。詞集二卷。國朝性德撰。案性德字容若。滿洲人。太傅明珠子。康熙十二年進士。官侍衛。鄉試出徐健菴司寇之門。通志堂九經解。即其所刻。韓慕廬有懷堂集。稱容若嘗輯全唐詩選。晚乃篤意於經史。茶餘客話。稱其天姿英絕。蕭然若寒素。擁書數萬卷。彈琴歌曲。評書畫以自娛。書學褚河南。幼善騎射。自入環衛。益便習。發無不中。扈蹕塞垣。珣弓牙箭。環列屬帳。以意製器。多巧。僮所不能到。嘗讀趙松雪自寫照詩有感。即繪小像。仿其衣裝。座客或期許太過。皆不應。徐健菴曰。何酷似王逸少。乃喜云。尤工倚聲。少作名側帽詞。吳漢槎兆騫以科場事謫寧古塔。攜焉。朝鮮使臣以一金餅購去。題云。使車昨渡海東邊。攜得新詞二妙傳。誰料曉風殘月後。而今重見柳屯田。兼謂顧梁汾貞觀彈指詞也。與梁汾交最密。見其所寄漢槎金縷曲二闕。泣曰。山陽思舊之作。都尉河梁之什。並此而三矣。此事弟當以身任之。告之太傅。漢槎遂以辛酉入關。然容若詞固自哀感頑豔。有令人不忍卒讀者。至如采桑子句云。瘦盡燈花又一宵。浣溪紗句云。生憐瘦減一分花。浪淘沙句云。紅影溼幽牕。瘦盡春光等。竊謂詞苑叢談稱沈江東嘲毛稚黃有三瘦之目。固當以移贈容若耳。詩亦清麗芊綿。固不僅自把紅窗開一扇。放他明月枕邊看。語近韓冬郎者。爲人傳誦也。詞舊爲袁簡齋太史所刻。今以此本校之。略有同異。此並詩集爲張詩舲中丞所刻。經梁汾審定者。殆足本耶。咸豐辛亥百花生日後。南海伍崇曜謹跋。

飲水詩集

擬古

清 長白性德著（原名成德）

煌煌古京洛。昭代盛文治。曰余餐霞人。簪紱忽如寄。微尚竟莫宣。修名期自致。榮華及三春。常恐秋節至。學仙既蹉跎。風雅亦吾事。

相彼東田麥。春風吹嫋嫋。過時若不治。瓜蔓同枯槁。天道本杳冥。人謀苦不早。荒廬日吁坐。百慮依春草。四顧何茫然。凝思失昏曉。

乘險歎王陽。叱馭來王尊。委身置歧路。忠孝難并論。有客贖黃金。誤投關西門。凜然四知言。清白貽子孫。客從東方來。叩之非常流。自云發扶桑。期到海西頭。白日當中天。浩蕩三山秋。迴風忽不見。去逐靈光遊。燭龍莫掩照。使我心中愁。

天門謫蕩蕩。翕絕羅星纏。白日曷微躬。假翼令飛鸞。平生紫霞心。翻然向凌烟。雙吹鳳笙歌。宛轉辭羣仙。越影籛浮雲。橫出天駟前。玉繩耿中夜。帝車何時旋。

曠然成獨立。片月相古今。睠茲西北樓。斜暉鳴玉琴。清影忽以去。悵悵予何心。

竹生本孤高。翛然自植立。矯矯雲中鶴。翔翔何所集。丈夫故豁達。身世何汲汲。外物信非意。潦倒翻成泣。

瞻彼嶺頭雲。扶疏被原隰。延佇當重陰。西風吹衣急。
寒沙連雲起。遙空白雁落。之子方從軍。深閨竟寂寞。
天遠豈知返。路阻長河絡。北風吹瘦馬。鐵衣不堪著。
從軍日未久。朱顏鏡中削。悠悠復悠悠。人生胡不樂。
妾如三春花。君如二月風。澹澹從東來。吹作天桃紅。
一朝從軍行。令人歎飛蓬。何似雲間月。清輝千里同。
天地忽如寄。人生多苦辛。何如但飲酒。邈然懷古人。
南山有閒田。不治委荆榛。今年適種豆。枝葉何莘莘。
豆實既可採。豆蘆亦可薪。

宇宙何蕩蕩。皇天亦安知。屈平放江潭。子胥乃鴟夷。
升沈本偶然。遇合甯有知。千古恨如此。徒爲弔者悲。
微生亦何幸。昂哉邁時期。

三月燕已來。清陰杏子落。春風在青草。吹我度城郭。
道逢貴公子。銀鞍紫絲絡。藉草展華茵。相邀共盃酌。
爲言相見歡。殷勤費酬酢。久之語漸洽。禮數少脫略。
初誇身手好。漫敍及勳爵。惜哉君卿才。何事失宦學。
子笑但飲酒。日暮風沙惡。走馬東西別。歸路烟漠漠。

余生未三十。憂愁居其半。心事如落花。春風吹已斷。
行當適遠道。作計殊汗漫。寒食青草多。薄暮烟冥冥。
山桃一夜雨。茵箔隨飄零。願餐紅玉草。一醉不復醒。

松生知何年。積鐵立一碧。其上無女蘿。其下遠荆棘。
何用託孤根。蒼崖多白石。亦有青蘭花。吐芬在其側。
美人臨殘月。無言若有思。含顰但斜睇。吁嗟憐者誰。
予本多情入。寸心聊自持。浩歌幽蘭曲。援琴終不怡。

私恨託遠夢。初日照簾帷。

安石負盛名。乃在衡門初。名僧既接席。妙伎亦同車。仕進良偶然。年已四十餘。軍國事方棘。圍棋看捷書。所以絲竹歡。陶寫待桑榆。晚造泛海裝。始志終不渝。馬策西州門。想像生存居。君看早達者。懷抱竟何如。涼風颯然至。秋雨滿空階。室有積憂人。所思在天涯。蟋蟀鳴北牖。蛛絲落高槐。明發出門望。爽氣正西來。西山有潤阿。肥遯以爲懷。

生本蒲柳姿。回飈任西東。心如秋潭水。夕陽照已空。落花委波文。天地如飄蓬。忽佩紫金魚。予心何夢夢。不如葺茅屋。種竹栽梧桐。貴賤本自我。榮辱隨飛鴻。何哉阮步兵。慷慨泣途窮。

客遺細綺琴。言是雷霄斲。能啼空山猿。亦飛秋澗瀑。援之發古調。三奏不成曲。朱絃淡無味。余亦那免俗。白雲本無心。卷舒南山巔。遙峯如夢中。孤影相與還。忽然間高霞。霏霏欲成煙。風花落不已。流輝轉可憐。皎潔自多愁。况復對下弦。高樓夜已半。惜此不成眠。

歲星不在天。大隱金馬門。微言亦高論。一一感至尊。文園苦愁病。凌雲氣蕭瑟。乘傳威始伸。諫獵情彌切。所爲一卷書。乃待身後出。

西漢有賈生。卓犖真奇士。齋志終未達。盛年身竟死。爲文弔屈平。可憐湘江水。忤俗謝勳貴。輕生答知己。臨風忽搔首。吾亦從逝矣。

鳳翔幾千仞。羽儀在寥廓。結巢梧桐頂。層雲覆阿閣。非無青琅玕。不寄西飛鶴。一鶴正西飛。翩翩長苦饑。

玉潭照清影。獨自刷毛衣。生得謝虞羅。光彩非所希。
初日淡楊柳。對之何所言。東風幾千里。吹入十二門。天地忽如寤。
青草招迷魂。堂堂復堂堂。春去將誰隨。世運倏代謝。風節棄已久。
罄折投朱門。高談盡獻畝。言行清濁間。術工乃逾醜。人生若草露。
營營苦奔走。爲問身後名。何如一杯酒。行當向酒泉。竹林呼某某。時有西風來。
吹香滿巖缶。不問今何時。臨風但搔首。宛馬精權奇。歛從西極來。
蹴踏不動塵。但見煙雲開。天關十萬匹。對此皆凡材。傾都看龍種。
還日登燕臺。却瞻橫門道。心與浮雲灰。但受伏櫪恩。何以異驚駘。

春風解河冰。咸里多歡娛。置酒坐相招。鼓瑟復吹竽。而我出郭門。
望遠心煩紆。垂鞭信所歷。舊壘啼餓鳥。吁嗟獻納者。誰上流民圖。
一騎紅塵來。傳有雙羽書。慷慨欲請纓。沈吟且踟躕。終爲孤鳴鶴。
奮翼凌雲衢。落日忽西下。長風自東來。天地果何意。逝水去不回。
世事看奕棋。切盡昆明灰。長安羅冠蓋。浮名良可哀。不如巢居子。
遁跡從蒿萊。

行行重行行。分手向河梁。持杯欲勸君。離思激中腸。努力飲此酒。
無爲居者傷。長安游俠子。黃金視如土。結交及屠博。安知重主組。
一朝列華筵。羞與朱履伍。惜哉意氣盡。委身逐傾吐。時俗尙唯阿。
至人亦傴僂。惟昔有贈言。深藏乃良賈。閉關謝西域。漢文何優柔。
聖澤逾亥步。遐荒如旬侯。旅葵旣充貢。越雉亦見收。蠻族進珊瑚。
不煩使者求。昭回雲漢章。燭及海外州。人生觀盛事。豈羨乘槎遊。

聖主重文學。清時無隱淪。遂令拂衣者。還爲棄繻人。適意聊復爾。去來若無因。昔采西山薇。今憶淞江蓴。結廬依深谷。花落長閉關。日出衆鳥去。良久孤雲還。迴風送疏雨。微芬扇幽蘭。白日但靜坐。坐對門前山。生世多辛苦。何如日閒閒。

與君昔相逢。乃在苧蘿村。相逢卽相別。後期安可論。揚蛾啓玉齒。聲發已復吞。詎絕賞音者。其如一顧恩。信陵敬愛客。舉世稱其賢。執轡過市中。爲壽監門前。邯鄲解圍日。韋矢引道邊。救趙適自危。故國從棄捐。功成失去就。始覺心茫然。再勝却秦軍。遭讒竟誰憐。趣歸不善後。作計非萬全。博徒賣漿者。名字亦不傳。惜哉所從遊。中詎無神仙。飲酒雖達生。辟穀乃長年。

積雪在房櫺。新月光欲凝。照地若無迹。娟娟破月暝。明燈遲我友。攬裘坐開徑。人生何茫茫。卽事偶成興。南飛有烏鵲。遶樹棲不定。持杯欲問之。東風吹酒醒。

魏闕有浮雲。蔭茲白日暮。返景下銅臺。歌聲發執素。流輝如有情。千載照長路。漳河不西還。百川盡東赴。時哉不可失。讜言思所悟。雨後望西陵。蔓草榮古墓。安得爲飄風。永吹連理樹。

彩虹互東方。照耀不知晚。川長組練明。關塞若在我。我友肯從征。三歲胡不返。邊馬鳴蕭蕭。落日照沙苑。封侯固有時。寄語加餐飯。

吾憐趙松雪。身是帝王裔。神采照殿庭。至尊歎映麗。少年疏遠臣。侃侃持正議。才高興轉逸。敏妙擅一切。旁通佛老言。窮探音律細。鑒古定誰作。眞僞不容諦。亦有同心人。閨中金蘭契。書畫掩文章。文章掩經濟。

得此良已足。風流渺難繼。

朔風吹古柳。時序忽代續。庭草萎已盡。顧視白日速。吾本落拓人。無爲自拘束。偶儻寄天地。樊籠非所欲。嗟哉華亭鶴。榮名反以辱。有客歎二毛。操觚序金谷。酒空人盡去。聚散何局促。攬衣起長歌。明月皎如玉。聖駕臨江恭賦。

黃幄臨大江。山川借顏色。鯨鯢久已盡。不待天弧射。按圖識要汎。懷古討遺跡。帆檣擒虎渡。營壘佛狸壁。時清非特險。何事限南北。却上妙高臺。悠悠天水碧。

虎阜

孤簷一片石。却疑誰家園。烟林晚逾密。草花冬尙繁。人因警蹕靜。地從歌吹喧。一泓劍池水。可以清心魂。金虎旣銷滅。玉燕亦飛翻。美人與死士。中夜相爲言。

江行

木落江已空。清輝澹鷗鷺。不見繫纜石。寒潮沒瓜步。帆移青楓林。人歸白沙渡。似有山猿啼。竊然瀟湘暮。平原過漢樊侯墓。

雲龍會影響。駕馭從豁達。樊侯鼓刀人。時來遂揮喝。一望重瞳營。再排隆準闕。良平信美好。對此氣應奪。斯人在層泉。猶勝懦夫活。

桑榆墅同梁汾夜望

朝市競初日。幽棲閒夕陽。登樓一縱目。遠近青茫茫。衆鳥歸已盡。烟中下牛羊。不知何年寺。鐘梵相低昂。無月見村火。有時聞天香。一花露中墜。始覺單衣裳。置酒當前簷。酒若清露涼。百憂茲暫豁。與子各盡觴。絲竹在東山。懷哉詎能忘。

爲王阮亭題戴務旂畫

心與西山清。坐對西山雪。山空多幽響。芳草久云歇。白雲如滄洲。縹緲不可越。丹青意何長。宛此山徑折。臥遊失所見。空林一片月。

暮春別嚴四蓀友

高雲媚春日。坐覺魚鳥親。可憐暮春候。病中別故人。鶯啼花亂落。風吹成錦茵。君去一何速。到家垂柳新。芙蓉湖上月。照君垂長綸。

送施尊師歸穹窿

突兀穹窿山。九九多松柏。造化鍾靈秀。真人爰此宅。真人號鐵竹。鶴髮長生客。天風吹雨輪。長安駐雲鳥。偶然懷故山。獨鶴去無跡。地偏宜古服。世遠忘朝夕。空壇松子落。小洞野花積。蒼崖採紫芝。丹竈煮白石。簷前一片雲。卷舒何自適。他日再相見。我髮應垂白。願此受丹經。冥心鍊金液。

寄朱錫鬯

萍梗忽南北。相聚復相離。去年一相見。正值落花時。秋風苦催歸。轉眼歲已期。浙浙秋葉落。綿綿秋夜遲。

開戶見殘月。道遠有所思。丈夫故慷慨。此別何凄其。明發攬塵鏡。新寒生鬢絲。

早春雪後同姜西溟作

西山雪易積。北風吹更多。欲尋高士去。層冰鬱嵯峨。琉璃一萬片。映徹桑乾河。耳目故以清。苦寒其如何。朝鴉背城來。晴旭滿岩阿。春泥凍尙合。九衢交鳴珂。忽覩新歲華。履端布陽和。不知題柱客。誰和郢中歌。

送梁汾

西窗涼雨過。一燈乍明滅。沈憂從中來。綿綿不可絕。如何此際心。更當與君別。南北三千里。同心不得說。秋風吹蓼花。清淚忽成血。

題李空同詩卷和王黃湄韻

李侯卓犖人。骨體本不媚。貂璫燄屢觸。全生偶然遂。昌言勗友朋。贈答不無謂。想其詩成時。良亦自矜貴。果得身後名。譏讒復何畏。

峻龍與經巖叔夜話

絕域當長宵。欲言冰在齒。生不赴邊庭。苦寒甯識此。草白霜氣空。沙黃月色死。哀鴻失其羣。凍翻飛不起。誰持花間集。一鐙氈帳裏。

宿龍泉山寺

招提偶然到。再宿離喧雜。列岫霽始開。雙扉晚初闔。禪心投鉢龍。梵響下簷鶻。既閒陵關望。亦謝主賓答。

遙夜一鐙深石鑪燒艾納。

輓劉富川

人生非金石。胡爲年歲憂。有如我早死。誰復爲沈浮。我生二十年。四海息戈矛。逆孽忽萌生。斬木起炎州。窮荒苦焚掠。野哭聲啾啾。墟落斷炊煙。津梁絕行舟。片紙入西粵。連營條相投。長吏或奔竄。城郭等廢邱。背恩甯有義。降賊竟無羞。予聞空太息。嗟彼巾幗儔。黯澹金臺望。蒼茫桂林愁。卓哉劉先生。浩氣凌斗牛。投軀赴清川。噴薄萬古流。誰過汨羅水。作賦從君遊。白雲如君心。蒼梧遠悠悠。

野鶴吟贈友

鶴生本自野。終歲不見人。朝飲碧溪水。暮宿滄江濱。忽然被繒繳。矯首盼青雲。僕亦本狂士。富貴鴻毛輕。冲舉道無由。幡然逐華纓。勳止類循牆。戢身避高名。憐君是知己。習俗苦不更。安得從君去。心同流水清。

填詞

詩亡詞乃盛。比興此焉託。往往歡娛工。不如憂患作。冬郎一生極憔悴。判與三閭共醒醉。美人香草可憐春。鳳蠟紅巾無限淚。芒屨心事杜陵知。祇今惟賞杜陵詩。古人且失風人旨。何怪俗眼輕填詞。詞源遠過詩律近。擬古樂府特加潤。不見句讀參差三百篇。已自換頭兼轉韻。

送馬雲翎歸江南

側身宇宙間。長嘯久獨立。之子我友人。南歸事蓑笠。交情如谷風。澹澹復習習。吹君度江去。片帆春雨溼。

棄捐世所悲。予獨爲君喜。君歸葺屋南山裏。燕麥青青纔覆雉。新鶯啼過眠未起。笑看我輩紅塵死。

趙松雪畫鵲華秋色卷

歷下亭邊兩拳石。不似江南好山色。乍看落日照來黃。渾疑切火燒將黑。更無楓橘點清秋。惟見蕭蕭白楊白。君爲此山令山好。空翠俄從楮間滴。知君著意在明湖。掩映山光若有無。曲折似還通濠口。蒼茫定不屬城隅。鯉魚風高網罟集。彷彿漁唱來菰蒲。一竿我欲隨風去。不信扁舟是畫圖。

新晴

新晴暖風吹柔荑。綠煙如翦稻苗齊。夕陽一片照長隄。隔雲殘雨猶淒淒。柳外如聞驄馬嘶。柳絲帶雨拂深閨。誰家少婦最高梯。凝情空怨錦江西。

又贈馬雲翎

岩薨最高山。山氣蒸爲雲。物本相感生。相感乃相親。吁嗟人生不可擬。君南我北三千里。一朝傾蓋便相歡。兩人心事如江水。君身似是秋風客。身輕欲奮凌霄翮。語君無限傷心事。終古長江江月白。世事紛紛等飛絮。我今潦倒隨所寓。惟願飲酒讀君詩。花前醉臥夢君去。

長安行贈葉訥菴庶子

長安舊是帝王宅。萬戶千門麗金碧。歌鐘甲第盡王侯。繡轡雕鞍照長陌。紛紛入眼競繁華。春日春光好。誰惜春風初吹上林草。一夜雪深山盡老。雪花飛來大如席。化作新泥徧周道。角聲鳴鳴破早煙。驚鴉飛。